

## ■ CONVIVENZA

# Sinceradad

DA BETTINA CADOTSCH\*

**B**etg avair tema, jau na vi betg dar in lavachau ad insatgi. Jau sun però tuttina da l'opiniun ch'i na fetschia tranteren betg donn da menziunar quant impurtant ch'igl è dad esser sincer.

**S**ch'i va bain, emprendain nus da pitschen da betg smanzegnar. Mes geniturs schevan adina ch'ins na vegnia betg lunsch en la vita cun manzognas. Els schevan ch'ins haja da star tar quai ch'ins ha fatg ed era d'emprender dad ir enturn cun las consequenzas. Els faschevan adina exempels e quai è restà en memoria a mes fragliuns ed a mai.

**J**au na vi uss insumma betg blagar, pens però che mes geniturs han uffants fitg sincers. Mintga giada ch'igl è capità insatge, ch'insatge vegniva rut u ch'i capitava insatge malgist, avain nus ditg quai ad els. Betg adina gugent, però tuttina adina ditg. Uschia hai jau emprendì che dir la vardad n'è betg adina pli simpel che dir manzognas, ma la finala porti dapli.

**M**es geniturs ans han numnadain adina sustegnì. Grazia a questas experientschas ed a questa educaziun è la sinceradad fitg impurtanta per mai. Jau n'hai nagina toleranza per manzognas. Donn che betg tuts na vesan quai uschia ... Deplorablmain n'è sinceradad betg insatge evident. Quai hai jau stuì realisar gist puspè dacurt.

**L**ain guardar curtamain tge ch'i signifitga insumma dad esser sincer. Esser sincer munta dad esser correct, fair ed avert. E quai betg mo cun auters, mabain era cun sasez. Sch'ins è sincer, pon ins crear fidanza. La fidanza è insatge che nus



umans vulain e duvrain simplmain per viver.

**S**che nus na pudain betg fidar a la glied, essan nus sulets. E n'èsi betg uschia che nus essan leds, sche auters èn sincers cun nus? Saja quai en famiglia, en relaziuns, tranter amis ed er a la lavur. En sasez en tut la societad! Sche nus gain a cumprar en insatge, sperain nus ch'il vendider dia la vardad. Nus essan leds da betg vegnir engianads, perquai che nus savain che nus na pudain betg controllar tut. Sulettamain uschia funcziuni da viver ensemen.

**C**ler, mintgatant vegn ins en situaziuns, nua ch'ina manzegna fiss forsa meglier che la vardad. E quai n'è betg adina simpel. I dat era las uschenumnadas manzognas necessarias. Ed uschia schainsa forsa mintgatant ina pitschna tschagula, forsa senza esser conscients e senza avair gronds sentiments da culpa.

**N**agin n'è pli sontg che Maria, uschia ch'i va mintgatant forsa era da betg dir la vardad. Jau na maneggel era betg exnum piculezzas e manzognas necessarias. Jau maneggel manzognas, nua che outra glied vegn engianada, prendida per il tgil e nua ch'ella avess in'otra opiniun u sa depurtass auter, sch'ella savess la vardad. I po esser manzognas da tutta sorts, manzognas che n'èn insumma betg en urden.

**I**l motiv principal daco ch'i dat talas manzognas è tenor mia opiniun il curaschi ch'i dovra per dir la vardad. Per part grond curaschi. La vardad fa mal, savens pli mal ch'ina manzegna. Giustifitgescha quai però da dir manzognas? Na! Mintgin ha il dretg da vegnir a savair la vardad. Dir manzognas è insatge per glied debla, dir la vardad insatge per glied ferma. Ferma glied po ir enturn cun consequenzas. Saja quai ch'ils conumans èn vilads, trists, nars e n'han pli nagina fidanza en ins. Ferma glied è buna da star sur quai e chapescha che la vardad è la finala tuttina la meglra varianta. Glied debla viva pli gugent decennis a la lunga cun manzognas, na dorma betg bain e va, tut segund il decurs da la vita, en fossa cun manzognas.

**L**a finala ston tuts savair lsezs, sch'els vulan dir manzognas u betg. En quel regard è l'uman uschè liber e nagin na po far prescripziuns. Ins sto però esser conscient: dir la vardad mussa il character, dir manzognas però era.

\*Bettina Cadotsch è creschida si a Savognin ed ha fatg la matura bilingua a Cuira. Actualmain lavura ella sco praticanta tar Radio Südostschweiz.

## Vocabulari

sinceradad – Ehrlichkeit  
dar in lavachau – eine Standpauke halten  
smanzegnar – lügen  
fragliuns – Geschwister  
blagar – prahlen, protzen  
capitar – geschehen  
vardad – Wahrheit  
esser led – froh sein  
vegnir engianà – betrogen werden  
manzegna necessaria – Notlüge  
prender per il tgil – auf den Arm nehmen  
glied debla – Schwächlinge  
esser vilà – wütend sein  
fossa – Grab

Unterstützt von der  
Lia Rumantscha



Lia Rumantscha